

**Disposición derogatoria única.** *Derrogación normativa.*

Queda derogada calquera disposición de igual ou menor rango no que se opoña a este real decreto.

**Disposición derradeira primeira.** *Habilitación normativa.*

O ministro de Economía, por proposta da Comisión Nacional de Enerxía, dictará instrucións técnicas complementarias adicionais ou de modificación ás xa existentes, así como outras disposicións precisas para o desenvolvemento e aplicación deste regulamento, que permitan a adaptación do sistema de medidas ó modificado no presente articulado.

Anualmente, ou cando circunstancias especiais o aconsellen, logo dos trámites e informes oportunos, o Goberno, mediante Real decreto, procederá á aprobación ou modificación dos prezos máximos por prestación de servizos dos diversos axentes en relación coas actuacións derivadas deste real decreto e normas de desenvolvemento.

Facúltase a Dirección Xeral de Política Enerxética e Minas para que estableza condicións particulares de aplicación deste regulamento e as súas instrucións técnicas complementarias, para determinados grupos de suxeitos do sistema que presenten características singulares.

**Disposición derradeira segunda.** *Entrada en vigor.*

Este real decreto entrará en vigor o día seguinte ó da súa publicación no «Boletín Oficial del Estado».

Dado en Madrid o 26 de abril de 2002.

JUAN CARLOS R.

O vicepresidente segundo do Goberno  
para Asuntos Económicos  
e ministro de Economía,  
RODRIGO DE RATO Y FIGAREDO

## XEFATURA DO ESTADO

**9787** *CORRECCIÓN de erros da Lei 21/2001, do 27 de decembro, pola que se regulan as medidas fiscais e administrativas do novo sistema de financiamento das comunidades autónomas de réxime común e cidades con estatuto de autonomía.* («BOE» 122, do 22-5-2002.)

Advertidos erros na Lei 21/2001, do 27 de decembro, pola que se regulan as medidas fiscais e administrativas do novo sistema de financiamento das comunidades autónomas de réxime común e cidades con estatuto de autonomía, publicada no «Boletín Oficial del Estado», suplemento número 1 en lingua galega, do día 1 de xaneiro de 2002, procédese a efectuar as oportunas rectificacións:

Na páxina 94, primeira columna, na exposición de motivos, I, primeiro parágrafo, antepenúltima liña, onde di: «... dúas disposicións transitorias, dúas disposicións adicionais...», debe dicir: «... seis disposicións transitorias, tres disposicións adicionais...».

Na páxina 95, primeira columna, na exposición de motivos, II, décimo segundo parágrafo, penúltima liña, onde di: «... (artigos 7 ó 17).», debe dicir: «... (artigos 7 ó 16).».

Na páxina 98, primeira columna, no artigo 4.A.c), penúltima liña, onde di: «... punto 1 do artigo 4.», debe dicir: «... punto 1 do artigo 3.».

Na páxina 101, segunda columna, no artigo 7.3, antepenúltima liña, onde di: «... o artigo 16.», debe dicir: «... o artigo 15.».

Na páxina 111, primeira columna, no artigo 45, onde di: «... os artigos 35 a 42...», debe dicir: «... os artigos 35 a 44...».

**9848** *LEI ORGÁNICA 3/2002, do 22 de maio, pola que se modifican a Lei orgánica 10/1995, do 23 de novembro, do Código penal, e a Lei orgánica 13/1985, do 9 de decembro, do Código penal militar, en materia de delitos relativos ó servizo militar e á prestación social substitutoria.* («BOE» 123, do 23-5-2002.)

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei orgánica.

### EXPOSICIÓN DE MOTIVOS

O actual proceso de profesionalización das Forzas Armadas en que se encontra España permitiu que, desde o 31 de decembro do ano 2001, tanto o cumprimento do servizo militar como a prestación social substitutoria quedasen suspendidos, en virtude dos reais decretos 247/2001, do 9 de marzo, e 342/2001, do 4 de abril, dictados en uso da autorización concedida ó Goberno pola disposición transitoria décimo oitava da Lei 17/1999, do 18 de maio, de réxime do persoal das Forzas Armadas.

Este cambio transcendental debe te-lo seu inmediato reflexo na normativa penal, sen prexuízo dunha posterior regulación dos supostos de incumprimento das obrigas relativas á participación de tódolos cidadáns na defensa, en consonancia co dereito e o deber establecidos no artigo 30.1 da Constitución.

Por isto, mediante esta lei orgánica déixanse sen contido os artigos 527 e 604 da Lei orgánica 10/1995, do 23 de novembro, do Código penal, que tipifican os delitos contra os deberes de cumprimento da prestación social substitutoria e de prestación do servizo militar, hoxe de imposible comisión.

A reforma sería incompleta se non afectase tamén á Lei orgánica 13/1985, do 9 de decembro, do Código penal militar. Así, derrógase o seu artigo 119 bis, que castiga o militar de contixente que inxustificadamente se ausentase da súa unidade, destino ou lugar de residencia por máis de quince días ou non se presentase transcorrido este prazo desde o momento en que debeu efectuar a súa incorporación. E tamén se lle dá nova redacción ó seu artigo 120, que tipifica o delito de deserción, que a partir de agora só poderán comete-lo militares profesionais e os reservistas incorporados ás unidades, centros ou organismos correspondentes do Ministerio de Defensa.

Finalmente, inclúese unha disposición transitoria coa finalidade de que se revisen as sentencias firmes dadas en relación coa comisión dos delitos que se despenalizan por esta lei orgánica, e de que se sobresean e arquiven os procedementos penais incoados polos ditos delitos.

**Artigo primeiro.** *Modificación da Lei orgánica 10/1995, do 23 de novembro, do Código penal.*

Un. A rúbrica do capítulo IV do título XXI do libro II da Lei orgánica 10/1995, do 23 de novembro, do Código penal, queda redactada nos seguintes termos:

«Dos delitos relativos ó exercicio dos dereitos fundamentais e liberdades públicas.»

Dous. Queda suprimida a sección 3.<sup>a</sup> do capítulo IV do título XXI do libro II e sen contido o artigo 527 do Código penal.

Tres. A rúbrica do capítulo III do título XXIII do libro II do Código penal, do que se suprime a súa división en seccións, terá a seguinte redacción:

«Do descubrimento e revelación de segredos e informacións relativas á defensa nacional.»

Catro. Queda sen contido o artigo 604 do Código penal.

**Artigo segundo.** *Modificación da Lei orgánica 13/1985, do 9 de decembro, do Código penal militar.*

Un. A rúbrica do capítulo III do título VI do libro II da Lei orgánica 13/1985, do 9 de decembro, do Código penal militar, queda redactada nos seguintes termos:

«Delitos contra o deber de presenza.»

Dos. Queda derogado o artigo 119 bis do Código penal militar.

Tres. O artigo 120 do Código penal militar queda redactado nos seguintes termos:

«Artigo 120.

Comete deserción o militar profesional ou o reservista incorporado que, con ánimo de subtraerse permanentemente ó cumprimento das súas obrigas militares, se ausentar da súa unidade, destino ou lugar de residencia. Será castigado coa pena de dous anos e catro meses a seis anos de prisión. En tempo de guerra será castigado coa pena de prisión de seis a quince anos.»

**Disposición transitoria única.** *Efectos retroactivos.*

No prazo de seis meses desde a entrada en vigor desta lei orgánica, os xulgados e tribunais competentes, de oficio ou por solicitude de parte e logo de audiencia do Ministerio Fiscal, revisarán as sentencias condenatorias firmes e non executadas totalmente dictadas como consecuencia dos feitos que en virtude desta lei orgánica deixaron de ser delito.

En todo caso, serán cancelados de oficio, logo do informe do xuíz ou tribunal sentenciador, os antecedentes penais derivados destes delitos incluso no suposto de sentencias totalmente executadas.

De igual modo, serán sobresidos e arquivados de oficio os procedementos penais incoados por tales feitos nos que non recaese sentenza firme.

**Disposición derogatoria única.**

Quedan derogadas cantas disposicións de igual ou inferior rango se o poñan ó establecido nesta lei orgánica.

**Disposición derradeira única.** *Entrada en vigor.*

Esta lei orgánica entrará en vigor o día seguinte ó da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumbran e fagan cumprir esta lei orgánica.

Madrid, 22 de maio de 2002.

JUAN CARLOS R.

O presidente do Goberno,  
JOSÉ MARÍA AZNAR LÓPEZ

**9849** *CORRECCIÓN de erros da Lei 22/2001, do 27 de decembro, reguladora dos Fondos de Compensación Interterritorial. («BOE» 123, do 23-5-2002.)*

Advertido erro na Lei 22/2001, do 27 de decembro, reguladora dos Fondos de Compensación Interterritorial, publicada no «Boletín Oficial del Estado», suplemento número 1 en lingua galega, do día 1 de xaneiro de 2002, procédese a efectua-la oportuna rectificación:

Na páxina 129, segunda columna, no artigo 5.1.3), onde di:

« $T_i = rF_n_i [1 - (\bar{R}_i/R)]$ »

debe dicir:

« $T_i = rF_n_i [1 - (R_i/\bar{R})]$ »

**9968** *LEI ORGÁNICA 4/2002, do 23 de maio, complementaria da Lei pola que se aproba o concerto económico coa Comunidade Autónoma do País Vasco. («BOE» 124, do 24-5-2002.)*

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei orgánica.

**EXPOSICIÓN DE MOTIVOS**

Esta lei orgánica procede da desagregación da disposición adicional primeira do proxecto de lei pola que se aproba o concerto económico coa Comunidade Autónoma do País Vasco, respecto da cal se sinalaba no citado proxecto a necesidade de lle atribuír carácter orgánico, na medida en que, en virtude dela, se procedía á modificación dun precepto de tal carácter.

En consecuencia, e atendendo ás directrices de técnica normativa que aconsellan incluír en textos distintos os preceptos de natureza ordinaria e os preceptos de natureza orgánica, tal como se desprende da xurisprudencia constitucional, a Mesa do Congreso dos Deputados, oída a Xunta de Portavoces, acordou a mencionada desagregación.

**Artigo único.**

Dáselle unha nova redacción ó punto 2 da disposición derradeira primeira da Lei orgánica 5/2001, do 13 de decembro, complementaria da Lei xeral de estabilidade orzamentaria, que quedará redactado como segue:

«En virtude do seu réxime foral, a aplicación á Comunidade Autónoma do País Vasco do disposto